

2023ko Arberoako Bertsolari Txapelketa Nagusiko Finala

Sustrai Xipolina Arotzarena

Lur gainetik ezagun / nuen Arberoa
Azpia deskubritzeko / nolako gogoa
Jendeak erranik ere / « ze gizon eroa ! »
Harpe barnean uros da / espeleogoa !

Jantzi dut ez hozteko / behar den arropa
Zakuan sartu zazpi / kilometro soka
Ogitarteko on bat / botoila ba Coca
Eta zer gerta ere / bixkotchak kiloka !

Barnean denak ziren / busti ta ilunak
Berdin berdinak ziren / gau eta egunak
Entzun nituen ere / hartz baten marrumak
Eta zer plazerra den / itzultzea hunat !



Maialen Arrmendarritz

Mendiak ikustean / elurrez gainezka
Pentsatzen dut hara joan / behar duzu
neska
Anapurna, Cho Oyu, K2, Everesta,
Maite duenarentzat / mendia zer pesta !

Temperatura hotza / zangoetan mina,
Izanik ere segi / gora ta aitzina,
Gailurrean egiten / dut beti berdina,
Selfie bat atera ta / eman ikurrina !

Begiratzean munduko / goi mendien karta,
Gehienak eginak / ditut pixkanaka,
Ximiko bat bihotzean / senditzen dut alta,
Oraindik Eltzarruze / igotzea falta !



Amets Hodei Arzallus Haundia

Belaontzia prestatzen / bost urtetik gora,
Azkenean abiatu / nintzen itsasora,
Haizeak hautatzen zuen / nundik joan
nora,
Ta ni goxo goxoki, kantan boga boga !

Uhainek untziari / egin erasoak,
Ekaitzaren ondoko / atsalde goxoak,
Izurde taldeak ta / berdin marrazoak,
Mila sorpresa sortzen / ditu itsasoak !

Atlantikoa utzi / pasa Amerika,
Australia ezkerrean / ta eskuin Afrika,
Segitzen ahalko nuen / hola itzulika,
Bainan Euskal Herria / dugu hain pollita !



Aitor Mendilabur

Itsasoari luzaz / egona begira
Ene buruak zion / joan behar zira
Lagunekin sartu niz / San Juan untzira
Temuara joaiteko / bale ihizira !

Agertu zaukun ura / zerura botaka
Harpoiekin ginuen / kolpatu xixtaka
Azken hatsa ez zuen / eman nahi alta
Luzaz eraman gaitu sokatik tiraka !

Bainan zoin tematia / den arrantzalea
Azkenean atera / zen irabazlea
Eta sinets nazazu / otoi entzulea
Orai gu ikustean / beldur da balea !



Milesker bertsoentzat gure bertsolari Ramuntxori !

Joanes Yurieggi

Txarangan ez nuke nahi / sortu kalapita
Mutxikoer ez diet / eginen kritika
Bainan deskubritzea / da zinez pollita
Nola egiten duten / munduan musika !

Abiatu Saharan / gero Japonia
Ipar polo hotzean / ta Patagonia
Jendeak ezagutuz / ah ze harmonia
Ohartu gabe sortu / dugu sinfonia !

Oihaletxe bat edo / igluaren itzala
Basamortuan itsas / bazterrean bezala
Batzuk ttakun ttakun ta / besteek lalala
Musika egitea / da unibertsala !



Neretza Ibarzabal

Eguna hasten dugu / ezti ezti ezti
Ganberako atea / zabalduz emeki
Hogoi minuta pasa / ta haurrak lo beti
« Beranta dugu eta / otoi oai jeiki » !

Xokotelesnea prest da / askaltzera jautsi
Ez dugu denobarrik / joko hori utzi
Kanpoan hotz egiten du / berokiak jantzi
Ta egun ez zazue / kartablea ahantzi !

Otoa aparkatu / segi fite segi
Kaiera izenpetu / binapott haurrei
Zoin akitua nizan / gorputza izerdi
Eta bakarrik dira / zortziak eterdi !




Beñaut Gaztelumendi

Ikasurteak uztailean / du bere helmuga
Bakantzak jitean ainitz / galdera ta duda
Usaian nik ez dakit / nola pasa uda
Aurten deskubritu dut / Euskarabentura !

Goiz batez abiatu / ginen oinez beraz
Lagun berrien artean / irri eta solas
Mauletik Getxoraino / ikus, entzun, ikas
Giro hoberenean / ta beti Euskaraz !

Gogoan ditut lagun / guzien izenak
Hiri handiak eta / herri ttipienak
Ezin badituz ere / hemen aipa denak
Hiru aste horietaz / zer orroitzapenak !



Alaida Martin

Itsasoan gabiltza / batetik bestera
Gu ikustean fite / joaitea hobe da
Gure itsasontziak / beltza du bandera
Pirata euskaldunak / gira gu gainera !

Merkatari ontziek / gurekin zigorra
Abordatzen ditugu / menperatzen, horra
Ondotik jakitea / da zinez gogorra
Zoin uhartetan dugun / gordea altxorra !

Bermeo, Elantxobe, / Lekeitio, Mundaka
Hainbeste portu eta / ontziak milaka
Denak erasotzeko / lanik ez da falta
Zu ere bilakatu / euskal pirata !



Milesker bertsoentzat gure bertsolari Ramuntxori !